

明
詩
紀
事

明詩紀事

貴陽陳 田輯



鄒守益 三首

守益字謙之安福人正德辛未第三人及第授編修
以議禮下詔獄謫廣德判官遷南禮部郎中就改吏
部召爲司經局洗馬兼侍讀遷太常少卿兼侍讀學
士出掌南翰林院就改祭酒以上疏落職歸隆慶初
贈南禮部侍郎謚文莊有東廓集十二卷

田按 四庫提要稱嘉靖二十九年九廟災守益疏
陳上下交修之道忤旨落職其疏具載明史本傳今
東廓集乃不載余檢史稱守益言殷中宗高宗反妖
爲祥享國長久帝大怒落職此數語具載本集九廟

災自陳疏內提要偶未檢耳謙之此疏辭亦不甚激烈蓋帝以議大禮故隱憾之耳

題扇

青山夾茅茨竹徑含煙霧時買泛月舟江上自來去

阻風池口晚霞登岸望九華

渺渺平原送落霞南風吹浪滯汀沙江神不是淹歸興留待晴光看九華

晚睡懷內重諸友

自笑驅馳兩載忙羨君隱卧北窗涼不知攜去浮峯石新種菖蒲幾許長

夏尙樸

四首

尙樸字敦夫永豐人正德辛未進士授南禮部主事

歷郎中出爲惠州知府投劾歸起山東提學副使擢南太僕少卿有東巖集六卷

田按敦夫講學得之斐一齋一齋出自吳康齋康齋詩入學廣派殊不耐觀敦夫詩清超可喜其論詩云漢魏以來至唐宋諸大家皆有典則至陳白沙自出機軸好爲跌宕新奇之語使人不可追逐蓋本之莊定山定山本之劉靜修規模意氣絕相類詩學爲之大變獨古選和陶諸作近之藍嘗究心此事宜其所作不入擊壤一派也

松溪

風潭百尺水溶溶潭畔亭亭萬樹松坐待夜深明月上一溪
寒影走虬龍

答周用賓

天上神仙不易逢相逢一半是孤筇何時直上郎峰頂看爾

青天騎白龍

題桂州象麓草堂

昔年卜筮三峯下象麓曾題舊草堂
明月柴門應自好不堪秋枕夢江鄉

雙溪

二水縈紆夾翠烟山中流出是何年
誰人結屋臨溪曲兩派風湍落枕邊

林文俊一首

文俊字汝英莆田人正德辛未進士
改庶吉士授編修累官南吏部侍郎贈禮部尚書諡文修
有方齋詩文集十卷

四庫總目文俊詩從
容恬適不事雕琢

將抵昌平

百里昌平道停車日未昏
浮生渾似夢舊事復誰論
小邑圍平野溪流抱獨村
向來征戰地營壘至今存

彭城夜泊

江海真成汗漫遊
秋風緊纜近黃樓
數聲寒柝孤城戍
幾點殘燈隔岸舟
水落枯萍粘古堞
棹移宿雁起平洲
可憐楚漢分爭地
今日惟聞水自流

常倫

四首

倫字明卿沁水人正德辛未進士除大理評事謫壽
州判官遷甯羌知州有評事集二卷

嵩渚集常評事詩疏爽有奇氣
藝苑卮言常明卿多力善射雖爲文法吏時韎韐附
注兩韃騎而馳於郊諸徹侯子弟從俠少年飲常前
突據上坐起角射咸不及問稍知爲常評事敬之奉
大白爲壽常引滿沾醉竟馳去弗顧又時過倡家宿
至日高春徐起或參會不及長吏訶之傲然曰故賤
時過從胡姬飲不欲居薄耳竟用考調判壽州庭置
御史以法罷歸益縱酒自放居恆從歌伎酒間度新
聲悲壯驕麗稱其爲人一日省墓從外舅滕洗馬飲
大醉衣紅腰雙刀馳馬塵絕從者不及前渡水馬願
見水中影驚蹶墮水刃出於腹潰腸死年僅三十四
平陽守王濬其故人爲收葬之常有詩弔韓信曰漢
代稱靈武將軍第一人禍奇緣躡足功大不謀身帶
礪山河在丹青祠廟新長陵一抔土寂寞亦三秦至
今爲中原
豪俠之冠
田按明卿豪縱詩頗效太
白寤於邊幅不稱其爲人

大醉後題大雲寺閣柱上

謝公昔高卧挾妓東山遊豈榮黃閣貴不顧蒼生憂簪綬聊

暫出江漢乃安流國器良有待局促非吾傳

李翰林

白也稱楚狂長嘯隘八極吐論識仙才浩歌知酒德藉藉陰
何間逸駕時凌逼召用嗟未幾風塵遂長謫寂寞彭咸居千
載爲惻惻徒傳驅巨鯨幽渺詎可測

玉泉亭

武帝時乘興金輿駐翠微至今看草樹猶似被光輝泉迸聞
仙樂雲流見畫旗亭高重回首冉冉下斜暉

采蓮曲

棹發千花動風傳一水香傍人持並蒂含笑打鴛鴦

柴奇

三首

奇字德美崑山人正德辛未進士授吏科給事中歷

南光祿少卿應天府丞進府尹有黼黻逸稿十卷

田按德美釋褐觀政吏部時楊文襄爲太宰德美上書言東南水利共要害無過白茅塘其次疏七陂之壅塞葺溧陽之五堰複江陰之一十四瀆可以興百年之利請以逆瑾沒入贗給工費言甚懇至厥後工部尙書李充嗣開白茅港疏吳淞江六閘月而工訖其論蓋自德美發之德美詩疏豁無滯七絕特有風韻

題湖東草堂卷

草堂開向沙湖東鷺鷥鸕鶿拈蒲叢溪雲飛去琴書潤艇子
歸來夕照紅

過邵伯湖

東風新水碧波平十里湖光一鏡明幾樹桃花傍茅屋祇應

人在畫中行

京口夜泊

幾樹寒松高閣前一燈無那對愁眠
惟應鐵甕城邊水相送行人不記年

張壁一首

壁字崇象石首人正德辛未進士改庶吉士累官太子太保禮部尚書東閣大學士贈少保謚文簡有陽峯家藏集三十五卷

劉郎浦

當年留滯行兵處今日淒涼賣酒家
惆悵遺蹤重弔古晚風殘月櫓咿啞

王以旂 一首

以旂字士招江甯人正德辛未進士除上高知縣徵授御史累官兵部侍郎兼僉都御史總理河漕遷南右都御史召拜工部尙書改左都御史尋爲兵部尙書總督三邊加太子太保贈少保諡襄敏有集四卷

送徐宇量

八月江南水茫茫萬頃通王孫尋勝蹟輕棹下吳中曙色寒鐘遠秋光醉葉紅行看長卿賦豪氣吐長虹

許成名 二首

成名字思仁聊城人正德辛未進士改庶吉士授編修歷諭德侍讀學士進太常卿掌國子監祭酒擢禮

部侍郎有龍石臺

海岳靈秀集龍石詩氣
平音和蓋晚唐之佳者

桃源道中

桃源縣南清水長
蓼汀蘆渚空茫茫
安流遙蕩雙槳去
殘雨猶帶秋雲涼
野鷗有時立高柳
沙鷗無數點橫塘
官情鄉思兩不定
繫舟何處蒹葭蒼

宿靈巖方丈懷雪泉

信宿靈巖尚未還
幽情暗與白雲閒
美人繫我松堂夢
清夜悠悠繞故山

王道

一首

道字純甫武城人正德辛未進士改庶吉士累官吏

部侍郎贈禮部尚書諡文定有順渠文錄

同年劉祠部士鳳遊玄武湖有詩見示次韻

問訊桃源路劉郎是舊遊何時楊柳岸繫我木蘭舟

屠僑三首

僑字安卿鄞人正德辛未進士授御史出爲延平知府歷廣東布政使進光祿卿累遷刑部尚書改左都御史加太子太保贈少保諡簡肅有東洲雜藁

田按簡肅不以詩名特有題

水東驛道中

炎海東來路龍川出避沙江村孤驛舍竹屋幾人家地瘠春無菜山稠樹少花瘴煙愁未已汗漫薄天涯

次文卿清明日老軍塘阻風志感

水逆兼風逆難窮汗漫程船頭折楊柳客裏過清明江蘆淒
煙雨天涯遠弟兄相悲重相別愁絕海雲橫

贈棟塘李先生

棟樹蒼蒼我白頭林塘無事比滄洲主人自分調三業野老
相從話四休涼月滿江秋放鶴夕陽平蘆暮歸牛謀生此意
爲真訣浮世聲華等一漚

汪文盛一首

文盛字希周崇陽人正德辛未進士除饒州推官徵
授兵部主事諫南巡杖闕下出爲福州知府歷浙江
陝西督學副使遷雲南按察使擢右僉都御史巡撫

雲南召爲大理卿有節愛詩集二卷

田按希周守福州時與高徽傳汝舟影刊宋本兩漢書頗稱好事巡撫雲南經營安南事伐謀制勝希周功爲多賞不副功史論惜之

擬古

昭陽歌舞正淹留
羌女新來勝莫愁
曲盡胡笳十八拍
爭扶

玉輦下瓊樓

王思二首

思字宜學泰和人太保直曾孫正德辛未進士改庶吉士授編修以言事謫三河驛丞心故官以議大禮杖死隆慶初贈右諭德有改齋集十卷

十八灘

春雨欲平岸灘灘無急流孤舟如鷁汎千里有礙愁世路風
波在吾生汗漫遊鬱孤臺突起疑是望鄉樓

登快閣

萬家煙樹澄江上長笛歸船愧白鷗忽見輕陰起天際恍疑
身在岳陽樓

游廬一首

瑒字世重連江人正德辛未進士累官廣東按察副
使有東行南行藁

過伏波祠

漢代中興將歸然重古祠江河洗甲杖雷雨捲旌旗夷落威
還肅英姿老未衰豐功滿南服不數岷山碑

趙德剛

一首

德剛字崇節閩人正德辛未進士官武昌通判

廣陵懷古

碧草白沙湖上隄隄邊楊柳有鶯啼瓊簫一曲今何在二十
四橋煙雨迷

汪必東

一首

必東字希會崇陽人正德辛未進士累官雲南參政
有南雋集

駐潯州

三峽聞藤斷雙流見桂平牂牁通道遠勾漏出江清何事虛
開府頻年未戢兵蕭條駐藩節慙愧說干城

周廷用 三首

廷用字子賢華容人正德辛未進士除宜黃知縣徵授御史出爲福建僉事進參議歷四川副使江西按察使有八厓集十三卷

國寶新編子賢才稟超融文鋒迅湧兼能博涉強記培植詞本故授筆長賦爛然成章

田按子賢七律音調高華

次水峽驛

隔岸長風吹白波蜀江千里暮愁多啼猿每聽三聲苦飛雁難逢一字過滿眼黃塵馳羽檄幾時滄海問漁蓑夜深月上灘聲靜時有巴人發棹歌

夜泊岳陽樓

波淨沙明月色浮孤舟又泊岳陽樓天低接水雁來度夜靜
抱珠龍出遊湖海放歌聊對酒鄉關聞笛易生愁君山縹緲
虛無裏欲躡風雲到上頭

登岳陽樓和朱凌溪韻

百尺高樓俯洞庭樓前波浪畫冥冥雨來湖水兼天黑雲去
巴山擁地青仙子傳書孤鶴下漁人吹笛老龍聽蒹葭零落
芙蓉冷誰采洲蘭弔屈靈

孫繼芳一首

繼芳字世其華容人正德辛未進士除刑部主事改
兵部歷員外諫南巡廷杖尋遷郎中出爲雲南提學
副使有石磯集

元湘耆舊集華容孫氏自副使至子雙先生凡五世皆以文學顯其曰洞庭漁人集五十三卷者副使之子宜也曰園居鳴鈇浮湖北遊等集者副使之孫斯億也曰遂初堂集十一卷者副使之曾孫羽侯也曰徵書四種今所存刪微三十六卷者副使之元孫穀卽子雙也副使立朝有風節詩其餘事

嵩明次韻

海畔青山山上城野橋驛路接昆明風開林木千章秀水抱沙田十頃平
繼井夜深人尙汲炎洲霜後瘴還生飄飄萬里西南路莫採芙蓉愴獨行

范輅一首

輅字以載桂陽人正德辛未進士授行人擢南御史以劾宸濠及鎮守太監畢眞下獄謫龍州宣撫司經歷起故官歷江西密雲副使遷福建布政使有三峯

二京宦游等集

遊靈谷和張汝立韻

草深迷野徑峰簇暗煙蘿
吠客犬聲遠照人花影多
到來空俗慮小住卽行窩
長嘯青山下人生能幾何

周敘一首

敘字子厚九溪衛人正德辛未進士除大理評事歷
寺丞以諫南巡廷杖謫永嘉縣丞起故官出爲韶州
知府歷四川副使山西按察使陝西布政使以右副
都御史總理宣大軍務入爲大理卿遷戶部侍郎改
兵部進工部尙書左遷侍郎

夏日過淨居寺飲流杯池

巾紫峯南淨居寺僧房遙倚半岩陰
徑連叢篠迷珠樹澗引飛泉落玉琴
說法壇空丹壑窅流觴池在綠苔深
勝遊誰繼蘭亭會幸有羣賢此盍簪

朱鳴陽一首

鳴陽字應周莆田人正德辛未進士授戶科給事中
累官浙江布政使有南岡集

蘭陔詩話南岡詩亦秀拔

書懷

世路多巇嶮奔走非予心
浮雲莽無極白日生層陰
寶瑟空自彈誰復爲知音
長歌賦歸去高鴻何冥冥

南大吉一首

大吉字元善渭南人正德辛未進士授戶部主事歷
郎中出知紹興府有瑞泉集

閒居

碧窓紅藥砌青簡綠牙籤花落鶯啼樹風回燕入簾

陸倕一首

倕字天爵吳人正德辛未進士官寶慶知府

岳岱今兩瑤草桃谷陸倕早登仕用無暇篇
章晚就操觚遂超多士靈心夙構穎悟居多

除夕

病拋簪紱風塵外老愧詩名五十聞華髮漸看青鏡曉草堂
重伴碧山雲春歸柳岸啼新鳥門閉江村帶夕曛獨酌椒花
燃柏子歲除空自嘆離羣

胡佩一首

佩字時鳴湯溪人正德辛未進士除萍鄉知縣有隴
南集

盆石

窻前置石盆盆中疊山石廣袤不數圍挈瓶小涓滴那知造
化工大小無所擇元氣一周流無處不融液居然盆石內草
木亦蕃殖綠葉閒黃花生意興勃勃不見春園中繁株嬌的
皜倏已秋風至焦悴無顏色花草雖細微亦或感衷臆頗類
幽人貞貧賤不移易又如晚遇士抱璞無人識不用傷白頭
對作楚囚泣

盧雍一首

卷十一
三
雍字師邵吳人正德辛未進士官監察御史有古園
集十二卷

毘橋兩渡

橋斷毘江路殘霞水底天渡邊還有渡莫怪急呼船

王濬一首

濬字公濟開州人正德辛未進士除沁水知縣徵授
御史出知平陽府遷鹽運使

春日同呂子遊王官谷

中條何逶迤天柱鬱嶙峋西指重華都世遠見隱淪矯矯司
空子誰能識其真所託元不偶孤嘯傷心神

袁達十二首

達字德修閩人正德癸酉舉人授貴溪知縣坐事下

獄既釋除湖廣都司經歷有佩蘭子集三卷

東南嶠外詩話佩蘭子詩大雅不羣非晉安派所能

田按佩蘭子近體詩詞雋格高在閩人中可與鄭少谷抗行世鮮傳本余所藏者爲林吉人樸學齋鈔本詩綜僅錄四詩不足盡所長也

貽傅丁戊山人

獨步才名盛三秋吟思高校書幽鳥下洗硯毒龍逃山色霑
遊屐花枝挂白袍散愁思爾過風雨暗蓬蒿

送晉安張白崖歸杭州

爲更滄海上彈琴桃樹前美名今不忝直道古難全纔解鷗
迎棹江流月送船春深煙水濶相望各愁牽

暮春約友登鰲峯

遊春城南春事深
花光醉眼亭臺陰
短窓伏枕夢不徹
高鳥喚人愁更吟
豈無白駒隔陋巷
不見黃耳來遐音
明朝赤脚踏鰲去
海上諸峯與汝尋

過西湖宛在堂

晉山不出事如何
日把綸巾濯錦波
五代宮堂王氣盡
一天湖水客星過
江妃倚竹羞環珮
山鬼迎人笑薜蘿
紫鱗白魚秋正美
滄溟萬里起漁歌

題王慈泉浣似堂

浣似堂開幾竹林
層軒窈窕雜花深
青藜夜動龍蛇影
彩筆秋淩鸚鵡吟
灤西鳥几聊漫興
市南美地安論金
散愁愛汝

經過易短辰長鎖時一尋

九日少嵩邀登烏石

高石長風吹鵝冠班荆晚酌自晨歡迴巖秀色黃花靜近渚
秋聲白鳥寒搖落江山傷錦樹沈埋日月憶金丹孤雲不礙
明雙眼天北天南一倚欄

登雁峯

全楚山河明眼界九天鐘磬自樓臺暮春花鳥愁詩句絕頂
煙霞照酒杯漫興且攜靈運屐離騷猶抱屈平哀青鞋皂帽
從今始獨倚孤雲意未回

遊温州江心寺

寺門通水長陰陰山雲結雨江樹沈禪僧翻貝鳥雀下前佛

幻世塵土侵波濤起伏蛟龍窟丹楫飄零湖海心安得草堂
春夢醒願言攜屐共登臨

春洲

春洲多杜蘅曠懷不可束天風自何來吹我紫芝曲

贈平山王總戎

寶弓夜挂青蘿月錦纜秋閒白鳥風花外釣絲雲裏屐將軍
指點似臨戎

舟次清口懋懷

江上離魂逐暮霞江洲愁目亂歸鴉官舟未發還過鼓直上
長安莫憶家

鄒頤賢二首

頤賢字養浩德州人正德癸酉舉人官平涼同知有

蘆南集

程先貞詩搜鄒公詩

直學漢魏深於樂府

山左明詩鈔蘆南詩深於比興多
所寄託得古人長言詠歎之旨

雜詩二首

人以支離全木以支離壽夫豈愛支離支離原可容才美生
嫉嫌而况自求售謙冲猶可爲驕盈乃速咎周公尙流言屈
平卒蒙詬庸鵲有過愆情亮不相構

初春氣猶肅柴荆風更寒布衾夙不溫寒士無好顏披衾坐
終夜情幽思亦立義理靜深省嗜欲無牽纏奈何牛山木斧
斤戕自然富貴斲天性貧賤吾何嫌

張綆 七首

綆字世文高郵人正德癸酉舉人除武昌通判遷光州知州有南湖集四卷

願璫寒松齋存稿世文爲詩文操筆立就尤工於長短句

朱曰陂山帶閣集南湖弱冠作無題詩及香區雜詩一時盛傳以爲淮海才子善長短句從王西樓遊早傳斯技之旨每填一篇必求合某宮某調第幾聲其聲出入第幾犯務俾抗墜圓美合作而出故能獨步絕響之後

田按南湖詞是當家詩亦輕俊可喜

效李長吉體

丁香枝上輕雷響南塘水碧蒲芽長狂風滿地吹花飛小翠
開簾燕子歸

雜詩

心逐行雲一向賒玉樓愁絕抱琵琶綠波細雨傷南浦紅樹
春風夢若耶自把芳心繫柳帶誰將遠意寄蘋花昨朝半醉
疏簾外獨立沈吟到日斜

飲司肇田舍用白樂天韻

年豐樽俎家家會地僻漁樵處處逢五畝君今開水竹一簞
吾亦在雲松野人醪飲畢秋穫鄰客答歌消夜春慚愧高賢
遠來意舉比無以慰相從

金陵清明日偕繻枻枻弟飲姪膽館用韻

春來夢遶水西田坐對東風一惘然吳地風塵淹去馬楚鄉
花木怨啼鵲三年寒食家山外此日清尊弟姪前想見柴扉
關細雨自將榆火試新泉

湖上

涼風吹羅衣自唱採菱曲日暮不見人秋蘋滿湖綠

秋詞

葉落空庭知已秋彩雲夢斷思悠悠從今莫向雕闌倚一葉芙蓉一葉愁

維揚懷古

廣陵城西百尺臺臺下遊人數往來煬帝行宮遺事在至今流水不勝哀

明詩紀事

貴陽陳 田輯

戊籤

唐皋 一首

皋字守之歙人正德甲戌第一人及第授修撰賜一品服充朝鮮正使進侍講學士有心菴集

列朝詩集學士老於場屋暮年始登上第爲文下筆立就或求籤易字句伸筆直書不製一字人咸服其才惜未究其用也

楊白花

楊白花飄飄落誰家渡江江水闊江岸多泥沙歸來舊時樹不妨舊棲鴉楊花不來楊葉愁江水晝夜隨東流

蔡昂二首

昂字衡仲淮安衛籍嘉定人正德甲戌第三人及第授編修累官禮部侍郎贈尙書有頤貞堂稿

寄顧鵬汀

雲中八月天雨霜北風蕭颯秋衣涼美人才高在散地苦吟
歲晚揚清商有時發興成獨往無枝假息聊疏狂丹山之鳳
久不作安得攜子鳴朝陽

送劉希尹同年

冥鴻得意且高翥鷲鳥高飛正刺天元祐黨人滄海上貞元
朝土曙星前煙花紫禁同遊少風月孤舟別夢牽遙憶政成
多暇日郡齋還紀著書年

靜志居詩話希尹誦草兩陳再答闕下其調知壽州也故事京官外謫出都時以服紵自蔽過部門選人擁其馬不前希尹撫紵於地曰吾無愧於官俾汝輩見吾面目可耳蔡鶴江送以詩云元祐黨人滄海上貞元朝士曉星前王耕原送以詩云君不見盤中紫脂蟹時昔橫行今安在又不見坐上虎皮袍當日負嵎思殺人世間反覆那可數鄙夫何事用心苦蓋以刺讒人也

劉天民 六首

天民字希尹厯城人正德甲戌進士除戶部主事諫南巡受杖改吏部進郎中諫大禮又杖闕下謫知壽州累遷河南副使改四川有面山集十卷

四庫總目天民擬宮詞五十首古別離宿楚相祠等作尙可謂怨而不怒者

董復亨繁露園集子讀邊李二公及面山集庭實若樂上之泉于鱗若華不注面山則大明湖槐柳婆娑蒲荷薈蔚

漁洋詩話劉希尹及與邊華泉相倡和古選在華泉

之上五言近體精探華妙遠不逮邊矣
田按希升以直諫名亦留心風雅不盡合轍漁洋謂
古選在華泉之上亦鄭山之言耳

有所思

幽居杳不愜新情無與語江草發相思山花亂愁緒涼風滿
故林明月下前澈何處抱琴來搔首曠延伫

雜詩

周轍不西馭王風散眞酒河嶽匪闕靈世豈無材人臣主不
兩遇千古流酸辛賈誼客長沙公孫操平津所應非所求漢
皇甯未仁果哉遵晦子撫化事沈淪

閩中歌二首

閩州城東天下稀閩州城西生事微松肪艇子機皮衣侵晨

翁媼犯潮去網得魴鱖薄暮歸

城下江流綠似羅城頭山色翠成窠美人勸酒朱顏酡未到
錦川卸鞍馬行人爭唱閬川歌

晚泊浮山寺

淮水西來看不流楚帆南下晚初收巖頭村老寺何古江面
雲平山欲浮錦石斑花迷遠望白鷗黃鵠動新愁上方未畢
登臨興它日重維洞口舟

用韻答任侍御元朴

雪白沙清秋可憐美人遙隔紫山煙傳來秀句多情致應在
花籬酒甕邊

蔣山卿 十二首

山卿字子雲儀真人正德甲戌進士授工部主事諫

南巡廷杖謫南京前府都事歷刑部郎中出知河南

府改潯州再改南甯遷廣西參政有南冷集十二卷

藝苑卮言蔣子雲詩如白臘糖看似甘美不堪咀嚼
四友齋叢說顧東橋文譽藉甚又處都會之地戶外
之屨常滿喜設客每燕必用樂乃教坊樂工也有小
樂工名楊彬者頗俊雅先生甚喜之常詫客曰蔣南
冷詩所謂消得楊郎一曲歌者也
國雅蔣參政才豪朗邁頗好激賞一時名士多延致
之其詩五言學杜無奇語
堅瓠集嘉靖臨御久簡於視朝日居西宮奉道初用
邵真人繼用陶真人官皆極品后妃而下法服以從
蔣子雲宮詞云君王親著紫衣裳白玉冠替入寶光
夜半碧壇星月冷九天仙樂下鸞凰離宮複道接蓬
萊雲繞千峯五色閒香輦無塵球箔捲後宮遙望上
陵回小年選入並珠宮紫閣玲瓏十二重日侍上真
修法事水晶盤捧玉芙蓉碧殿瑤壇禮上清桂花甘
露浸銀屏雙雙玉女扶青案跪啟琅函調道經
田按參政詩格調整齊微有陳色錄其清婉者亦自

楚楚

長門怨

故愛心非故新人意自新
長門風月夕別院管絃春
苦侵文履迹絲縈網戶塵
卻憐宮草細尙可藉車輪

王昭君

拭淚新裝束朝來殿裏辭
何堪辭訣日卻是見憐時
漢騎臨關少胡笳出塞遲
琵琶寫哀怨淒切轉添悲

烏夜啼

門前楊柳樹借汝烏夜棲
郎眠夜未半無奈汝爭啼

夏山詩爲張用載作

于越多名山會稽饒禹蹟
探穴懷子長疏峯思謝客
識迴趣

彌遠興在情自適夫子金華彥山中此維宅危構基層巔高
齋鄰峭壁石澗展迴轉雲林互蒙幕褰帷挹空翠開窗抱虛
白神超詣高曠理悟玩幽寂一爲簪組累長與煙霞隔綠蘿
寄遐興蒼苔迷舊迹大道有卷舒至人戒沈溺功成謝塵鞅
終老卧磐石

譙國薛考功君采

七友詩錄一

薛子無雙士千載乃一見翩翩颯鸞舉矯矯雲龍變貞心保
沖素自然匪營鍊立言析秘奧文詞餘采綯妙契感同懷乖
隔情彌眷丹梯果可攀朱門何足戀

秋夜過君采宅

過訪清秋夜俱懷楚客悲芙蓉不可采江上重相思霜華早

零落風葉日參差共爾一杯酒此情人詎知

八月十五夜懷京中舊遊

今夕那無月他鄉獨上樓兵戈添白髮幕府滯清秋對酒傷
前事尋詩數舊遊呼童把官燭漏盡不能休

夏日休園

晚來無一事偃仰任疏頑門對青山掩心將流水閒數杯邀
月上孤艇信風還卻笑巢居子虛名落世間

失鶴

尙憶疎林下清宵明月光花陰眠小徑松影踏長廊磊落情
相似翻飛意不忘怪來幽思極夢落水雲鄉

送吳子鍾

我愛能詩吳少微風流醞藉眼中稀沙明雪樹人遙去江動
雲濤帆亂飛滿把金尊臨別浦高張錦瑟送斜暉蕭蕭爲憶
南溪竹日日開林遲爾歸

春興

遠水湖邊靜春風野外多踏青二三月芳草意如何

溪上

山風木葉飛夜雨松花落散帙坐高齋幽心成寂寞

馬明衡 一首

明衡字子莘莆田人少卿思聰子正德甲戌進士

明史

作丁丑誤除太常博士遷監察御史以建言廷杖削籍

蘭陔詩話嘉靖三年興國太后誕辰舉行朝賀慈壽皇太后誕辰有旨免朝子莘上言暫免朝賀若出皇

太后中間必有因事拂抑之懷往來存沒之感若出
聖意則母子之情有隆無已豈忍輟此盛禮哉朱侍
御制亦上言皇太后親挈神器以授陛下母子之情
天日在照今乃旬月之間一舉一罷彼此相較形迹
太分何以慰母心而隆孝治疏入永陵震怒命梓二
人至庭詰問將置之死蔣文定膝行泣救乃免子莘
與父翠峯稱雙忠
田按子莘初春卽事詩云疏謬自甘明主棄孤狂甯
受世人憐可以見其志矣

答黃西壺先生

孤亭高敞紫霞旁招隱歌成逸興長靖節早應歸栗里龐公
久不入襄陽百年海上丹心遠五月松風白葛涼徙倚危闌
瞻北斗山中夜夜挹清光

林大輅一首

大輅字以乘莆田人正德甲戌進士授工部主事以

諫南巡予杖下詔獄謫夷陵判官起故官出爲江西

僉事以副都御史巡撫湖廣有愧瘖集十六卷

嵩渚集林以乘詩若萬事看斑鬢十年遲素書岐路
長風雨春山有蕨薇遠漸彭澤宰深巷掩荆扉之句
良佳

東南嶠外詩語二山之下詔獄也其妻黃夫人留
舍日夕焚香籲天爲其夫祈免鄰人衛尉修夙怨誣
以詛呪並逮入獄鞠訊時備極楚毒不肯承主者危
詞怵黃黃懔懔慨對曰妾夫被繫妾焚香告天幾幸皇
輿不出忠良獲免則誠有之庸敢有他妾以見女子
無知使吾夫重獲罪戾惟有一死以謝官家並謝妾
夫妾方有身分不任受刑願速賜死主者口噤而罷
居五日始得釋二山有詩紀之云那知罹百災菜妻
欲同死纔械分天牢雷霆威如此顛沛裂肝腸涕下
孰能已並死誠堪傷一生差可擬決絕語通奇否秦
俟神理是日夫婦偕出獄都人士聚觀稱爲鐵夫人
田接二山與馬子莘同鄉同年其和子莘咏志詩云
佩玉須璜珩佩草須芝蘭砥礪非奇珍蕭艾隕微寒
二人並以志節著又有句云邱壑元貧賤廟廊白聖
明斯言也可以怨而不怒矣

浮蹤

浮蹤甘屏裔簿領亦閒閒虎跡村間路猿聲郭外山四愁仍
欲結雙鬢慚成斑長見乘槎者天風萬里還

劉儲秀一首

儲秀字士奇咸甯人正德甲戌進士授刑部主事歷
郎中出爲山西提學副使歷湖廣按察使以右副都
御史巡撫遼東擢戶部侍郎進尙書改兵部

田按尙書爲部郎時與僚屬薛君采胡承之張孟獨
倡和爲詩社都下號西翰林

酬馬戶部雨中送別

老去江鄉識馬卿那堪別路雨猶鳴年華冉冉嗟何待世事
悠悠久未成江上黃蘆鴻雁影山前紅槿鷓鴣聲亦知不是

悲秋客笑問如何太瘦生

顧璵三首

璵字英玉上元人正德甲戌進士除南工部主事改兵部歷郎中謫知許州遷温州同知歷山東僉事進河南副使有寒松齋集六卷

靜志居詩話英玉爲東橋從弟東橋詩有落魄吾家蘇季子風流南郡小馮君蓋謫牧許州時所寄也東橋聞息園以延賓客載酒促席諸亭朋簪滿座伎樂雜陳而英玉居隔一牆臨街小樓曰寒松齋者坐卧其上訓童子以自給所謂名教之外別有風猷者耶

碧溪

何處濯塵襟澄溪湛空碧悠然寄眞賞靈境斷行迹雨散灌木陰煙寒孤嶼夕流淙激鳴絃峭石礙輕幘日暮澹忘歸白

國共分席

隱吏亭

卷幔青山入拋書白日長
苔茵承屐穩竹粉惹衣香
病喜諳禽戲貪嗔減鶴糧
自堪稱吏隱不用問行藏

送楊生東歸

南雁驚鄉思新寒入客衣
故人憐遠別把酒送將歸
楊柳暮潮暗蒹葭夕露微
今宵江上月何處共清暉

簡霄一首

霄字騰芳新喻人正德甲戌進士除石首知縣歷大理丞以僉都御史巡撫河南進南副都御史提督操江就遷兵部侍郎有蓉溪集

和袁別駕除日

歲事撩人懶出郊殘棋且聽隔窗敲新筠柏葉春浮甕待訪
梅花雪滿梢天上故人懷久別山中勝事覓新交明朝又是
明年到獨守殘更未忍拋

吳鎧

一首

鎧字文濟陽穀人正德甲戌進士授行人擢監察御史出爲福建按察副使歷陝西參政雲南按察使以
僉都御史巡撫甯夏

涇州

隴坂秦雲暗涇原春草萋河流沙漠外亭列玉門西雪嶺傳
烽火天山震鼓鼙酬恩當此日戰馬向風嘶

翟瓚一首

瓚字廷獻昌邑人正德甲戌進士累官右副都御史
巡撫湖廣有蟲吟草

塞上曲

朔風吹合太行雲千里旌旗盡漢軍何事雁門先失守漁陽
鼙鼓不堪聞

彭大治一首

大治字宜定莆田人正德甲戌進士累官長蘆運使
有定軒集

長安旅舍

書齋僅容膝門巷不容車朝朝埽落葉庭樹在鄰家

林炫一首

炫字貞孚閩人尙書庭掾子正德甲戌進士歷官通政參議有榕江集

古意

轆轤上深井一轉一愁結井水有時乾愁心幾時歇

自君之出矣

自君之出矣玉鏡多塵埃思君如鯉魚永夜雙眼開

桑溥一首

溥字伯雨濮州人正德甲戌進士歷官浙江按察使有宦遊閒居二集

登咸陽北原

高原出飛蓋四望暫徘徊
水入黃河去山從華嶽來
漢陵埋宿草秦苑剩遺灰
莫數興亡迹秋深客思哀

顧可久 一首

可久字與新無錫人正德甲戌進士授行人諫南巡
受杖降國子學正遷戶部員外議大禮復受杖尋進
郎中出爲泉州知府改贛州擢廣東副使有在署在
疾釋禪溫陵虔州珠厓在潤等集

題繡嶺草堂

司徒焚魚歸故山
山中高結玄都壇
前岡時傳笙鶴度
疊嶺曾有龍蛇蟠
繡林娟娟長搖草
陰洞拂拂飛霞丹
座上春風不可東
振衣飄灑青雲端

錢憲

一首

憲字國章無錫人正德甲戌進士官常山知縣

秦從川邀入吟社

春社臨芳墅青林變渚禽題襟思漢上修禊繼山陰花氣薰
飛竿泉聲答玉琴追歡興無那刻竹記清吟

陳能

一首

能字大用華容人正德甲戌進士歷延平知府終廣
西參政

已公菴

山雲濃作雨石瀨淺流花擬約浮邱伯同來咽紫霞

范永鑾

一首

永鑾字汝和桂陽人正德甲戌進士除貴溪知縣徵授御史出爲福建副使改陝西歷河南按察使遷四川布政使

題朱氏醒溪亭

峭峽迴青嶂虛亭俯碧流
林花飛綺席鷗鳥下春洲
曲水流觴入高軒縱鶴遊
主人醒道眼清嘯坐忘憂

雷應龍一首

應龍字孟升蒙化州人正德甲戌進士除莆田知縣徵授御史

送別陳大剛上舍

仕路一萬里儒冠三十年
蹉驢明日道回首亦悽然

金賁亭

一首

賁亨字汝白臨海人正德甲戌進士歷官福建副使

田按汝白建懷詩云謀生力拙仍干祿用世才疏敢擇官可謂真學

贈西溪居士

野性本愛溪結屋溪上住酒醒山月明溪雲自來去

陳器

一首

器字德器臨海人正德甲戌進士除淮安推官遷刑

部主事進郎中有石居漫興稿

彭城與同年伍汝文周少安別

曾多忘是客別近覺愁人風雨偏當夜鶯花又送春悲歡燈
下酒去住夢中身魚雁江湖足來書莫厭頻

林春澤 一首

春澤字德敷侯官人正德甲戌進士授戶部主事遷
員外謫甯州同知歷吉安通判肇慶同知遷南刑部
郎中出爲程番知府有人瑞翁集十二卷

聖瓠集侯官林德敷生於成化庚子至萬歷己卯一
百歲劉中丞商御史爲建人瑞坊德敷謝詩云翠旗
谷口萬松風喘息猶存一老翁詎意夔龍黃閣上尙
憐園綺白雲中擎天華表三山壯醉日桑榆百歲紅
願借末光乘晚照康衢朝暮頌華封又四年卒子應
亮嘉靖乙未進士以戶部侍郎侍養年亦八十六卒
孫如楚嘉靖乙丑進士工部侍郎卒年八十二
閩小紀侯官林太守春澤少年與鄭少谷方棠陵張
崑崙爲詩友其子應亮則少谷之壻也有人瑞翁詩
行世
東南嶠外詩話人瑞病起卽事示憲兒起見价夫薦
夫二外孫詩云賴有兒孫供筆札碧桃花下寫新詩
不類老年頽放之作

早秋登昌平城樓

城上高樓凌紫清山城氣候早涼生居庸南去蟠三晉天壽
西來奠七陵秋興又窮湖海望帝鄉獨繫古今情登樓不道
非吾土何處林端蕭瑟聲

戴欽二首

欽字時亮馬平人正德甲戌進士授刑部主事進員
外以諫大禮受杖有鹿原存稿九卷

四友齋叢說馬西立極重戴時亮二公皆工初唐故

也露嘗戴時亮詩如曲江春色早直爲麗人催離愁撥
不開結在春江樹春風亦作替花態恰似花前卻倒
吹皆佳句也

汪森粵西文載時亮詩清新俊逸

田按廣西志及粵西文載均云時亮以受杖死余檢
明史當時以諫大禮受杖死者十七人無時亮名又

時亮姪希懶跋鹿原集云丙戌時亮卒於京師考受杖在嘉靖甲申七月至丙戌已隔二年則非杖死明矣時亮詩音節瀏亮粵西詩家在明中葉此爲翹楚

興安道中遣興

不是天涯子誰知行路難
高江吞地轉翠嶂倚雲蟠
斗口牽腸曲龍塘照膽寒
萬重煙樹外何處望長安

明妃怨

自倚顏如玉誰知畫失真
卻憐胡地老虛作漢宮人
淚泣龍沙月魂棲鳳輦
塵翻思兩黃鵠連翼上林春

張治道二首

治道字孟獨一字時濟
長安人正德甲戌進士授長垣知縣遷刑部主事有太微前後集

對山集孟獨有所作子輟稱善若鮑謝復出沈宋
三
再作

藝苑卮言張孟獨詩如罵陣兵瞋目揎袖果勢壯往

嘉靖丙戌六月五日京兆驛觀進貢獅子歌

嘉靖中葉稱至治海內紛紛多異瑞天子雖閉玉門關狡獪
猶自遠方至嗚呼此物胡爲來鉤爪鉅牙身崑鬼忠順邱墟
土番叛西域之國絕貢獻月支疏勒稱西極此物十年達中
國傾都之人盡來觀我亦走馬入長安長安市人色無歡爲
道食羊賣縣官一時無羊人遭鞭羊備猶索打乾錢高鼻番
人眼如拳錦衣繡袴赤檻前有時玩弄口生煙踞地咆哮聲
震天百獸伏匿虎豹癘瘵大不復鳴青田噫嘻先皇好搏獸
豹房虎圈親來闕自謂眞龍虎敢當挽衣一近遭虎傷至今

海內傳其事嗚呼此物安足視鳳凰絕鳴麒麟不遊牛馬不
蔽野狻猊達皇州我來觀罷生繁憂

青樓曲

長安狹邪緣水濱青樓羅綺暗生春碧紗窗外東風起飄落
楊花不著人

霍韜一首

韜字渭先南海人正德甲戌進士除兵部主事以議
大禮驟貴擢少詹事兼侍講學士進詹事兼翰林學
士歷禮部侍郎大禮成超拜尙書以事下都察院獄
輸贖還職以母喪歸起吏部侍郎出爲南禮部尙書
加太子少保贈太子太保諡文敏有渭崖文集十五

卷

四庫總目輯性強執謬戾不顧是非議尊與獻爲皇考則斥司馬光不知忠孝不當從祀孔廟議合祀天地則竝詆及周禮可謂無忌憚者其他文亦皆爭辨迫急異乎有德者之言

贈方棠陵用陶飲酒韻

衡湘古雄邦風氣猶頗眞民居限山溪習尙稱古淳羲皇雖世隔濂溪迹尙新九疑留舜轍桃源嗟暴秦迨今百世下湮淪同飛塵君行過湘江敦古心應勤精神苟相契異世情自親他年石屋歸爲藏折角巾候我採藥來山花我主人

左國璣二首

國璣字舜齊尉氏人正德丙子舉人有南部集

中麓閒居集左中川國璣詩無副稿身後被衆客商改換首尾展爲彼作

四溟詩話左舜齊曰一句一意意絕而氣貫此絕句之法一句一意不工亦下也兩句一意工亦上也以工爲主勿以句論趙韓所選唐人絕句後兩句皆一意舜齊之說本於楊仲弘
盛明百家詩盧工部刻左中川集敘稱其豪縱磊落爲文馳騁踔厲才藻逸發殆信然矣
明詩統中川空同內弟得之琢磨爲深
明詩選陳卧子曰左君跌宕亦未成家
田按舜齊與田深甫並稱舜齊馳騁有餘較深甫爲優

芳洲吟

蒿艾徒滿握不如佩蘭芷所期芳洲人弭棹在何許烟波浩無際凝望獨延伫日暮思不來涕泣零如雨

九日訪白塔

嚴霜日午氣不煖客到竹扉僧自開已見高梧下黃葉更憐叢菊委青苔甌將茱萸供茶入拌出山蔬送酒來郭外相逢

惟老衲劇談常是月中回

田汝棘 一首

汝棘字深甫祥符人正德丙子舉人官兵部司務有

莘野集

四溟詩話大梁田深甫從李獻吉遊嗜酒醜詩十三科不第嘗擬少陵秋興詩得盛唐氣骨

西亭書院偕孫東蒙宴集

不識王孫館翛然水竹鄉林堂秋黯淡烟澹晚蒼茫會留
孫綽追陪愧子方傳杯散圖史餘興滿滄浪

董穀 一首

穀字碩甫海鹽人處士漢子正德丙子舉人除安義
知縣改漢陽有篆龍子四存前後集

構李詩繁碧里山樵詩新警可前

塞上曲

貢道紆回馬市平
令嚴邊塞敢誅徵
聖主不乘照夜白
遠臣休貢海東青

洗劍潮河冰滿川
彎弓古北雪封韜
將軍好著燒荒令
莫遣花當易近邊

吉梁二首

梁字大用丹陽人
正德丙子舉人除
京山知縣改塾

江

田按大用詩有別趣惜不多見

登吸江亭

江畔懸崖開一亭天垂四面列如屏窗含千里雪霽白座擁
無數秋山青有客弔古鬼泣句何人瘞鶴僧傳銘酒酣長嘯
日西下松際月來心自醒

春懷

茅堂生事雨中饒菊圃分畦種藥苗花鳥向人成主客江山
容我作漁樵破除午寂琴三弄滌蕩春愁酒一瓢不到西園
纔雨日亂紅棲草綠垂條

陳文學一首

文學字宗魯貴州宣慰司人正德丙子舉人累官耀
州知州有耀歸存稿餘生續稿

黔詩紀略陽明先生謫龍場驛丞提學席副使嘗請
居文明書院爲諸生講知行合一之學得其傳者首

推陳宗魯陽明居夷集中獨有示宗魯詩蓋進之也

上巳日

昨日清明楊柳芳今朝上巳齊花香可憐佳節多風雨孤負
臨流泛羽觴榆火新煙歌老杜蘭亭舊事憶諸王洗心未竟
童心在狗俗無勞祓不祥

明詩紀事

貴陽陳田輯

戊蠲

舒芬一首

芬字國裝進賢人正德丁丑第一人及第授修撰諫
南巡授杖謫福建鹽課司副提舉嘉靖初起故官議
大禮再杖歸萬厯中追謚文節有梓溪內外集十八

卷

田按正德己卯車駕將東巡祀岱宗厯徐揚抵南京
蘇州復派江浮漢登太和山是時宸濠久蓄異謀待
變而發結陸完錢甯爲內應人情洶洶懼禍不測國
策與同館編修崔桐庶吉士汪應軫曹嘉王廷陳馬
汝驥江暉聯名疏諫有曰痛哭泣血不忍爲陛下言
者江右有親王之變大臣懷馬道之心以祿位爲故

物以朝署爲市廛以陛下爲奕棋以革除年間爲故
事言甚激烈時陸完以智術倖掌銓部利帝遠出得
以久其位又倖宸濠之謀遂則有非望之福造爲惡
語以阻抑諫者謂帝間直諫便舉刀爲劊狀且曰今
撒賴矣國裳不爲沮復要同鄉夏考功良勝萬儀制
潮陳太常九川至寓舍酌酒訣曰匹夫不可奪志吾
儕乃爲大臣所奪乎今日之事當死諫無二復聯名
疏諫楊遂菴詩所謂江西四君子北闕幾封章也受
杖幾死嘉靖初復與同官諫大禮再杖闕下瀕死不
悔世稱爲忠孝狀元國裳登第後其壻省視來京送
歸詩云杏園回首幾經春敢卜移家住要津偶逐風
雲上霄漢獨勞車馬驚京座夢魂無定憐親遠骨肉
相看賴汝眞歸去朋從如問我爲言官似秀才貧可
以見其志節矣

出郭

野外尋幽雨過初
碧山澗淡畫難如
未能莊子舟藏壑
欲買謝公墩
結廬高樹間
雲輕護鶴小橋
新水淺通魚
因緣莫向
山僧話
安得禪心片月孤

倫以訓 一首

以訓字彥式南海人正德丁丑第二人及第授編修

歷官國子祭酒有白山集十卷

田按祭酒諭德文敘之子文敘弘治己未會試殿試皆第一祭酒兄以諒鄉試第一祭酒正德丁丑會試第一殿試第二弟以詵亦成進士科名鼎盛冠絕一時南海之倫靈寶之許世稱為南倫北許

江行

柳色青迎路花光紅到船何須聽簫鼓唬鳥卽繁絃

崔桐 一首

桐字來鳳海門人正德丁丑第三人及第授編修諫

南巡授杖歷侍讀累遷國子祭酒南禮部侍郎有東

洲集二十卷續集十卷

折楊柳

出門折楊柳卻憶贈君時分明春在手不是去年枝

張岳一首

岳字惟喬惠安人正德丁丑進士除行人諫南巡受杖謫南國子學正嘉靖初復故官遷右司副改南兵部員外歷郎中出爲廣西提學僉事改江西以忤張璁謫廣東鹽課提舉遷廉州知府歷浙江副使遷參政改廣東擢右僉都御史撫治鄖陽移撫江西進右副都御史總督兩廣軍務兼巡撫進兵部侍郎改刑部再改兵部進右都御史總督湖廣貴州四川軍務降兵部侍郎卒後敘功復右都御史贈太子少保諡

襄惠有小山類稿二十卷

蘇茂相寶善類編張襄惠岳撫仁右夏相言築賜塋廣信七邑議各致千金岳曰是將範金爲槩乎邑百金足矣嚴相嵩奉敕建延恩樓復減其費曰是非元老意況供費如式實奉明旨嚴銜之陽致書謝曰延恩之制誠儉然如足下則爲伯夷之所築後三阻其內召多方齟齬之岳與所知書曰稜稜寒骨只欠馬革一張自分已定人如之何又曰自古刀鋸鼎鑊皆儒者當之云

焦竑嚴徵錄嚴氏擅政二十年制閭不入一錢沒得完其身名者僅岳一人耳

靜志居詩話襄惠文治武功所至登績詩其餘技然如宛宛西飛日餘光照我裳江空流月華白石光淩亂理深物有悟與極感相因幽篁迷舊蹊回磴距飛輟非熟精文選理者不能作也

瑯琊寺

朝遊瑯琊山暮宿瑯琊寺寺古山徑荒寒林積空翠慨念千載人欹枕不成寐六一安在哉智僊亦已矣燃燭讀殘碑剝

落不可紀誰謂金石堅所託謾復爾秋風拂庭柯落葉盈階
瓦所以稱達生靜觀良有以不見龕中僧白髮垂兩耳

張經 三首

經

榜姓

字廷彝侯官入正德丁丑進士除嘉興知縣

徵授吏科給事中歷戶科都給事中擢太僕少卿歷
大理卿以右僉都御史巡撫山東進兵部侍郎總督
兩廣軍務以功進右都御史兵部尙書以憂去起三
邊總督尋報罷起南戶部尙書就改兵部總督直隸
浙福軍務改右都御史兼兵部侍郎爲趙文華所構
逮至京論死隆慶初復官追諡毅愍有平洲集七卷
靜志居詩話襲愍詩特
清婉無拔劍橫梁氣

沔池亭上對竹

小亭頗虛敞石竹三五竿輕颯颯然至蕭蕭秋雨寒相逢若
舊侶對此真忘餐盤桓坐將晚新涼襲衣單我懷耿不寐秉
燭夜已闌明時有鳳鳥愛爾青琅玕

少谷深入武夷九曲日肝不得食因抱病崇安書來以
文稿相託隨放舟南下抵家之次日而終焉或者不
能無憾於山水之癖因賦

卧病崇陽日貽書攜李時遙傳歸棹晚每惜到家遲道誼青
霄迴文章白首期誰能探造化灑泣對新詩

慈恩寺

慈恩開古寺坐對曲江頭雁塔寒雲滿南山爽氣秋更無題

姓字空復見陵邱往事誰堪問橋西水自流

夏言 十八首

言字公謹貴谿人正德丁丑進士授行人擢兵科給事中歷吏科都給事中擢侍讀學士進少詹事兼翰林學士掌院事歷禮部侍郎進本部尙書加太子太保進少傅太子太傅兼武英殿大學士入參機務加少師特進光祿大夫上柱國進吏部尙書華蓋殿大學士以忤旨再致仕落職閒住尋起故官議復河套爲嚴嵩所構棄市隆慶初追諡文愍有桂洲集十八

卷

四庫總目言詩文宏整而平易值明中葉之舊格
焦竑玉堂藏語貴溪人貴用事故事閣臣日給酒饌

當會食貴溪與分宜供事二職貴溪不食上官供家
所攜酒饌甚豐飫什器皆用金與分宜日對案分宜
自食大官供不以一七及也分宜謂華亭吾生平爲
貴溪所狼籍不可勝數而最不堪者二事其一大宗
伯時貴溪爲首揆俱在直欲置酒延貴溪者數矣多
不許間許至前一日而後辭則所徵集方物紅羊貌
狸消熊棧鹿之類俱付之烏有一日候出直乃敢啟
齒又次揆諸城爲從吏則曰吾以某日赴自閣出卽
造公不過家矣至日諸城爲先憩西朝房以俟乃貴
溪復過家寢於他姬所薄暮始至就坐進酒三勺一
湯取略沾唇而已忽傲然起長揖命與諸城亦不敢
後三人者竟不交一言

野獲編嘉靖乙未春正月朔大雪上諭大臣曰今日
欲與卿等一見但蒙天賜時玉耳禮卿夏言卽進天
賜時玉賦以獻上大悅以忠愛褒之言亦能詩然不
甚當行獨長於新聲所著有白鷗園詞藁豪邁俊爽
有辛幼菴劉改之之風其謀復河套作漁家傲詞亦
其一也夏之蘇夫人亦工詩餘更是作家

國史唯疑謁陵有扈從有居守有頒賚有獨免錢糧
遠如薊遼總督總兵官咸於昌平迎駕列兵擺防特
戒嚴未易輕舉本朝惟宣世穆神四宗一再行之武
廟亦經駐蹕焉夏言詩百年不覩朝陵駕父老歡呼

識漢儀隆

重可

列朝詩集少師賦才敏捷奏對應制倚待立辦喜爲
長短句在南宮與燭吏虞山楊儀夢羽倡和今所傳
元相桂翁詞及陽園新曲皆夢羽序而行之少師得
君專取聲勢烜赫詩餘小令草藁未削已流布都下
五相傳唱歿後未百年翳然無聞花間草堂之集無
有及貴溪名氏者可一慨也夢羽記一事云少師嘗
所夢九鯉仙得問舟子三字及罷相再起泊舟淮上
與夢羽賦詩照別取孟浩然詩探韻拈得問舟子詩
云向夕問舟子前程沒幾多灘頭正好泊淮裏足風
波悵然不舉罷酒而別此事亦可入前定錄也
靜志居詩話貴谿遊覽贈酬之作不及分宜而應制
詩篇投頌合雅不若袁文榮之近於褻也
田按貴谿驕蹇當時語云不視費宏不知相大不見
夏言不知相尊觀弱侯玉堂叢語所紀其取禍宜矣
五言特具高韻才本揮霍長禮部時與翰苑諸公賦
觀蓮歌聯篇次韻層出不窮雖未盡合節要亦豪宕
之作也絕句
尤有風致

夜興

微颿振華樹疏櫺透涼月虛堂華燭燼別館清琴發芳思徒
延貯山川豈吳越幽夢遶西樓迢迢度城闕

羅琴士卷

拂拭朱絲琴一彈白雪吟調高嘆寡和絃絕爲知音以我邱
壑想契君山水心相思洞庭闊悵望匡廬岑

偏橋道中

祇役越荒服言歸念何時迢迢道路遠奄忽日月移筋力苦
登頓山川多嶮巇驅車高嶺顛騁轡絕澗涯俛聆眾壑淙仰
睇孤雲馳去家萬餘里覩物勞我思怪禽翔水曲猛獸嗥山
基崖傾瘴雨黑林深毒霧滋壯遊經坎壈憂端亂難治

送李子中

盛夏理嚴裝詰旦臨廣路洛騎方北旋吳檣會東鵞清颿動
野莽落日隱關樹眇眇余停瞻依依爾還顧

折楊柳

征人赴交河楊柳鬱婆娑馬上各攀折歲暮無餘柯岸上居
人少河邊戰骨多不敢望舊鄉寒裳淚滂沱

贈涂夢卜令新昌

春雲冠層城初陽耀丹闕衢路羅祖席車蓋儼成列束裝及
良辰解纜值嘉月修塗喜新踐久誼傷今別聖朝重明牧玉
書簡英傑矧茲艱難會弘濟仗達節陽城自殿課催科甘處
拙何武居無名遺思乃在舊昔賢務寬政豈弟有成說新昌
古名邑山水擅句越子行勵微猷慷慨紹前烈敷辭媿膚率

撫已矜薄劣

贈劉儀制伯兩擢南京尙寶卿

祇命謝朝闕抗旌背京里東曹循舊章南國遲新軌設筵芳
甸側停騎清江俟高臺飛雲霞緒風蕩蘭芷飲餞萃時哲綢
繆盡知己高人負經濟弱冠振才美十年守郎局勞勩存邦
禮瞻茲波蕩中拯溺恃君子把別非予心卽事昧成理指塗
波嶺重稅駕風塵弭卜室鍾山旁賞花石城裏舊京神懸地
廟社方毗倚百司貯才彥猶足直國紀符臺本名卿豈必親
玉璽祇虞江湖上廊廟憂未已太息抱情殷永言愧辭俚

萃墨亭歌爲徐州洪李主事香作

彭城城邊秋繫舸黃河漲發波掀簸隔水遙開水部亭有亭

卷之三
一
安樂山之左我聞此亭新落成築臺聚石見高情百年歷藻
星辰聚千秋遺墨煙雲生憶昔坡翁守茲土月中之遊果誰
伍張老還攜鐵笛吹潛公自袒袈裟舞一時清興真可憐片
石題名今宛然那知埋沒黃塵下復得摩挲碧檻前古人蹤
迹今不朽文章照耀看身後昭代諸公盡才彥西涯東白名
山斗登臨嘯咏古今同人代推遷感慨中悠悠白日浮雲外
杳杳洪波砥柱東亭中我是初來客臨風重灑淋漓墨芒碭
山前木葉飛滿天鴻雁悲秋色呂梁白浪高崔嵬盤渦轉石
鳴萬雷天關撼裂地軸動吁嗟氣勢何雄哉北風蕭蕭捲河
水落日吳帆下千里夏子高歌爲誰起作亭主人豫章李

象麓草堂初成和杜

繞院松杉雲氣流小窗高枕碧江幽秋山杳杳唳立狖晚水
冥冥飛白鷗伏枕經年須藥裹閉闕長日下簾鉤得閒且覓
邱園樂汨汨風塵何所求

晚歸自象山有懷諸友

溪上人家竹樹青溪頭野客眼偏明斷雲將雨江城遠蠟屐
穿花徑路平春洞酒杯勞夢想夜巖燈火隔書聲西齋此夕
成孤寂草滿池塘蛙亂鳴

侍上舟行恭述

曉日明柘袍鮮雲護華蓋舟轉碧楊灣騎繞青林外

鄱湖道中

落葉走迴風幽花媚奇石白雲無定蹤時看度青崖

送巾石呂子得告南歸

滄波渺予望送子意何極便欲製山巾還山煮白石

江南曲

江頭楊柳花風吹渡江水愛殺雙鷺鷥只在池塘裏

江皋曲

江上蘼蕪草東風吹又生聞郎早晚回日日堤上迎

侍上泛舟金海

萬歲山前一棹迴御舟遙望近南臺柳陰不省宮車過隱隱
輕雷水際來

張家灣阻風

張家灣裏滯行舟洪河嘴邊河水流闌風伏雨作秋暝汀蓼

清蘋生野愁

弋陽道中

篠簜渡頭楊柳低桃花灘上子規啼
蘭橈蕩入葛溪口三十

二峯春日西

顏木
五首

木字維喬應山人正德丁丑進士除許州知州改亳

州有燼餘稿四卷

藝苑卮言顏惟喬文如暴顯措大不堪造作

湖北詩徵傳略湘潭王山長曰漢東顏木與信陽同

時作詩最有風骨而近時操選家不之及何耶

田按顏東橋巡撫湖廣聘王稚欽顏維喬王汝化同

修承天大誌書成永陵弗用惟喬詩格調甚高燼餘

稿已不可得余從李時遠明詩統搜詩數篇亟登之

出塞

結髮事戎行年年瀚海旁
離旌搖漢日候騎出胡霜
月滿交河白沙飛絕塞
黃征衣今已被惟有劍花光

從軍行

秋草三邊白胡霜八月飛
羽書馳上郡烽火發金微
七竈空尺籍千層纓鐵衣
左賢生已獲右地虜應稀

贈劉漢陽致仕

皋亭黯黯看江柳煙雨霏
霏隱漢槎世道於人真一
夢東風送客好還家
雲連獨戍悲清角月帶空
城起曙鴉誰賦文通舊時
恨甘棠莫剪別來花

贈陳進士伯恭出使關陝

曙色沈沈秋已陰雁傳丹
葉下霜林更堪別酒悲中
淚還聽

寒城雨外砧。賈誼上書才。調別杜陵夢。鬢毛侵當年。衰颯成何濟。猶自江湖一寸心。

關山月

關月明於晝。征人晚未還。高樓有思婦。一夕損朱顏。

馬汝驥

五首

汝驥字仲房。綏德州人。正德丁丑進士。改庶吉士。諫南巡杖闕下。出知澤州。召還爲編修。歷修撰。司業。南右通政。就遷國子祭酒。擢禮部侍郎兼侍讀學士。贈尙書諡文簡。有西立集八卷。

藝苑卮言。馬仲房詩。如程衛尉屯西營斥堠精嚴甲仗雄整而士乏樂用之氣。

四友齋叢說。馬西立遊西山古詩。清警藻綯。田按。侍郎詩。鏤金錯綵。頗極璀璨之觀。惟少變化。

城南園亭燕集

闔閭苦紛雜引轡南郊園陰林既攢岫名花復繞原矚目倏
清曠矧乃陪高軒芳粒薦綠水旨酒傾金尊攀桂長淹留折
蘭成笑言情洽禮或簡時暎道並存共美邱壑放何羨霄漢
翻歡樂亮難久感慨願已煩流鶯遙自集春草萋更繁百年
事未測何用勞心魂

元日祀孝陵和通參二首

高皇弓劍遠禋報有祠官鬱鬱開元祀松楸改歲寒神光浮
翠壑瑞氣遶朱闌對越聞周頌貽謀萬國安

晨光浮寢殿松柏路微分玉豆修元日金燈結瑞雲一戎開
國大八葉泣天勤內使題新句青藜照紫氛

駕幸西壇

龍墀鼓角傳鳳駕出春田芝蓋晴圓日霜戈曉拂天壇開仙
陌草幄引御爐煙潘賦今誰奏遙聞賜綺筵

答江子謁陵之作

王氣浮周邑仙才表漢陵西山盤玉殿北斗錯金燈霜露簪
纓謁風雲劍舄升龍髯攀望地翠木繞寒藤

王謳十三首

謳字舜夫白水人正德丁丑進士除工部主事歷刑
部員外出爲山西僉事有彭衙集九卷

對山集舜夫才情之妙機軸不凡蓋作者之雋
藝苑卮言王舜夫詩如敗鐵網取珊瑚用力堅深得
寶自少

盛明百家詩王子詩有氣骨有聲武皇朝非倖也

列朝詩集舜夫有高才而無貴位故多煩促唯殺之音五言隱秀時可尋味
田按舜夫詩集存詩太多蕪蔓不翦時有俊篇不愧名家竹垞嗤爲關中下農無乃唐突

閒居雜興

日月不照愁天地不哀死豈特造化乖杳冥存至理昔聞商山翁採芝餐石髓末世重浮華泯沒如蟲蟻

夜發

別葉悲修榦飄蓬憶本叢莫言曾固帶俱是逐秋風迢遞天涯遠倉皇吾道同愁心懸更切白髮欲成翁

撥悶柬張用載員外

嗜酒眞吾性爲官不近名薄祿遊帝里漫刺向公卿去已慚亭伯狂甯學禰衡相知憐汝在江海共含情

端陽後一日南湖亭子讌集

歲月虛爲客乾坤限此亭曲池一水綠細雨亂山青
鰣魚能樂招呼鶴最靈酒杯天貲汝入手莫教停

山行

絕壁纔容步孤岩穩著花春風不世態此地亦年華
黃鳥學兒語白猿作道家平生愛泉石隨意宿雲霞

不寐

旅次嫌多事羈危轉獨身馬牛須任汝形影自相親
久別樊川勝如何太白春心傷渾欲碎空老未歸人

曉雨登舟

泛舟此河曲曉雨生微涼瀟瀟洒洒鷗波淨夷猶洲渚長
雲靄翠

壁濕日沒青林光多興未云已遙從覓酒漿

晚坐

浮雲起層漢迴野生微陰獨坐廣庭暮愛茲嘉樹林青山入
復暝黃鳥寂無音搔首悲歌發悠悠傷我心

秋日山行

長川漭東鷺白日忽西歸秋色浩無際寒天孤鳥飛風霜羈
旅切關塞故人稀九月黃花節淹留感授衣

望泰陵

寡昧慚穉散休明憶聖朝風雲猶鬱鬱松柏竟蕭蕭弓劍仙
原闕謳歌帝德昭放勳如可作直欲贊神堯

冬日訪吳園贈主人

村徑還蕪滅林居亦畫闌
雲輕到竹門雪暮連山雙舞隨
玄鶴孤飛放白鷗心期真出世幽事自相關

見碧堂卽事

見碧堂中春晝靜主人好事卻攜壺獨留古木爲鄰並一任
幽禽相叫呼泉石自耽遊鹿豕衣冠不識有公孤對君堪笑
青雲客三十爲郎一腐儒

識野別

官柳石橋風日幽祖筵春水席邊流浮生行樂有誰厭爲別
多情難自由黃鳥銜花逐燕子青山閣筆對林邱芳年勝集
那能數往事關心者去愁

汪應軫

二首

應軫字子宿紹興山陰人正德丁丑進士改庶吉士
諫南巡廷杖出知泗州嘉靖初遷戶科給事中改南
尋出爲江西僉事引疾歸起故官提學江西有青湖
文集十四卷

田按青湖南巡大禮皆以直諫著議大禮時以戶科
改南故不在受杖之列詩非所留意然風送飛花入
硯香池塘新句夢生涼村家歲晚無新歷山鳥一聲
知是春驛路送人千里月的臺遲我一帆風水檻煙
波雙鳥白雲門花竹六橋深亦佳句也

江寺同馬子莘遊

濱江十里文通宅江上寒潮日夜哀彩筆已隨春蜨化遺文
空對野花開六朝賦手誰能敵古寺遊蹤我暫來莫怪風流
憐宋玉夕陽千古一荒臺

過樂遂亭聞竹聲摘蕉葉書一絕送世明兄

臨階倚修竹風從竹梢起秋雲段段飛美人隔湘水

王鳳靈 二首

鳳靈字應時莆田人正德丁丑進士授刑部主事歷
郎中出爲襄陽知府歷官廣西參政有筆峯存稿

送鄭少谷歸鰲峯次韻

貧病今如此遠遊意若何冥鴻歸路杳芳草故園多郎署慚
何補鰲峯好放歌無能共把臂長嘯入煙蘿

過分水關

無情如此水各傍故山流何事山中客年年作遠遊

鄭洛書 一首

洛書字啟範莆田人正德丁丑進士授上海知縣擢
河南道御史出爲南畿提學以憂歸起故官以誣免
有思齋文集

木蘭晚泛

蘭谿歸路晚款乃棹歌喧
拳鷺依沙聚唳鴉繞樹翻
山容全黯淡野色漸黃昏
仰見林端月纖纖露一痕

楊士雲

七首

士雲字從龍大理太和人正德丁丑進士改庶吉士
授工科給事中改吏科有弘山集

滇南詩略給事以病辭歸環堵蕭然手不釋卷與楊
升菴張禹山友善升菴贈詩云螭頭早挂進賢冠跡
遠東暉玉笋班倦意已還飛鳥外歸心元在急流間
仙郎高議留青瑱學士新詩滿碧山十九峯前同醉

處夢中瓊樹幾回攀

田按從龍名在楊門六學士之列詩品可與張禹山方駕非徒性耽吟詠兼博涉典籍集中讀尙書石經等詩非學人不能著也

讀東坡書東臯子傳後

不飲喜客飲家常多釀酒無病憂人病蓄藥欲來取藥病輕
吾體客飲適吾口得意專自爲此樂人知否待詔醞三升東
臯給一斗東坡月釀醑復賴五太守氣味類相似千載可爲
友

憂旱

農家望有年得雪衆方喜天胡愆雨期曠旱復茲始蘊隆蒸
六合赤地幾千里安得呼天公雷車卽奔駛亦欲訟風伯金
蛇掣無止翻騰四海波倒瀉銀河水慰茲大地渴一灑山川

燬中有感通機庶徵乃其理願修雲漢誠斯異或可弭

八日

此日占宜穀連陰喜復晴燕風溫旖旎山雪盡分明
肥憶紅綾餅香聞七菜羹製頭春酒滿對客勸飛觥

升庵先生至榆

卧病青山舊龍鍾白髮新相逢一笑後又別幾回春
檐燕去來數江花開落頻冷然仙馭至喜得挹清塵

人日

此日是靈辰焚香拂座塵羲皇經一卷七十六閒人
寒勒花遲發春催柳未勻回風飄急雪山色玉嶙峋

次韻酬升庵太史

曾伏青蒲地上冠久虛華蓋殿東班直從董賈敷陳後未數
王楊伯仲間徵召幾時天北極高名千古博南山九龍池畔
相思夢寸碧遙岑幾度攀

田按博南山人升菴別號

石經

洛陽四十六碑亭太學門前看石經遷鄴半殘千古迹入關
誰續六書形雨餘礎柱苔文綠雲裏浮圖鳥篆青獨有開成
遺刻在至今猶自說熹平

許相卿

六首

相卿字伯台海甯人正德丁丑進士官兵科給事中
有雲村集十四卷

四庫總目相卿詩五言有大歷之調七言出入於陳師

道陳與義間

橋李詩紫相卿號九杞乞歸後以鹽邑紫雲邨山水

佳勝移居村南茶磨山別石引泉疏畦藝茗時跨黃

犢短藝高笠二鶴自隨往來山谷間嘗大雪上雲岫

絕頂賦詩人望之以為神仙自號雲村老人又於永

安湖買山置杜曲岡雲濤莊後人因名其山曰九杞

最為夏忠愍所重忠愍召起道經嘉禾以書致相卿

與決進止於時潘臬郡縣嚴舟祇候道相望也相卿

葛巾荔帶刺一小舫詣夏夏問曰僕此出何如相卿

不答第言可惜李長源卻受觀察判官夏正襟起謝

曰便當疏辭以奉明教須臾撾鼓迴帆顧諸祇候一

時散去夏慨然遂不果辭卒及於難相卿詩多清冷

有丰骨

田按雲村以直諫名乞歸後入西村詩老小瀛洲社

又為孫太初置鶴田可稱好事詩格不甚高而人品

既超自無俗韻

宿石門山房

塵土三年夢雲林勝日遊小招聊擬賦多難獨憑樓月色于

山午江光滿意秋心期應共汝投老白蘋洲

南樓

幽興屬羣眺凭高散餘醺徘徊出海日邂逅還山雲度鳥江
天永斷絕吳越分超然俯清曠何處有塵氛

除夕感懷

酒冷香銷夢不成逼人殊覺歲崢嶸老如舊歷年無用醉戀
殘燈亦暫明雪散已應隨臘盡梅花甯復與春爭向來筋力
虛名盡白髮無愁也自生

靜志居詩話雲村詩取適意集出其手自剛自強絕
句云雲村病老語多哢造次詩成雜宋腔還潮開元
論風格拾遺壇上樹旌幢由今誦之諸體亦自清潤
不全難以宋腔也若老如舊歷年無用病戀殘燈亦
自明此則空腔之佳者

獨往

興到海濱成獨往，千林風日淨娟娟。
寒山病骨晚爭瘦，白鷺滄波秋可憐。
天地閒愁塵夢醒，煙霞勝事草堂偏。
斜陽深徑漁樵盡，弄影蕭蕭石上泉。

題扇畫

遠路歸來已白頭，豐厓猶似舊時秋。
長藤短褐行吟處，不道山翁是故侯。

月林僧舍

月午天霜破衲寒，梵音蕭颯度林端。
經殘香爇秋寥次，時有風枝語夜闌。

朱豹一首

豹字子文上海人正德丁丑進士除奉化知縣改餘姚擢監察御史出爲福州知府有朱福州集六卷

過靜安寺

空山無事易黃昏僧抱孤雲卧竹根寂寂迴廊春欲暮落花
滿地不開門

郭波一首

波字澄卿閩人正德丁丑進士官戶部主事有巖存稿

夜坐

蟲鳴四壁靜露濕山月冷雲外鶴不歸孤松散清影

戴顒一首

繇字時重鄧人正德丁丑進士除刑部主事歷員外
出爲四川僉事以事奪職起河南僉事歷江西參議
遷副使改雲南廣西進江西參政山西按察使歷廣
西四川江西布政使以副都御史巡撫四川有中丞
遺集八卷

張時徹芝園定集中丞負恢廓之才不屑屑爭雄鉛
槧然長篇短咏流布人間識者寶之
甬上耆舊集中丞詩老健蒼涼是一作手

六月旣望同時化弟謁甬川太宰還舟中述懷

放舸城南觸熱新濯纓欲傍滄江蘋濕雲挾雨時過水晴鷺
將雛翻趁人偶向竹洲綠窈窕徑須松壑上嶙峋祇今多病
兼樗散浩蕩輕鷗覺汝親

胡侍一首

侍字承之咸甯人正德丁丑進士除刑部主事歷員
外遷鴻臚少卿坐議大禮謫潞州判官以事逮至京
斥爲民

藝苑卮言胡承之詩如病指大習白猿公術操舞如
度擊刺未堪

登漢武帝立都壇

曲磴回谿數百重漢皇行幸有遺蹤海西不復來三鳥巖畔
虛傳駐六龍碧露暗滋金洞草紫雲常護石壇松便應別著
登山履策杖高尋玉檢封

陳文沛一首

文沛字維德長樂人正德丁丑進士除工部主事歷

郎中出知撫州府改蘇州歷霸州兵備副使進陝西
行太僕卿有世槐堂稿

驛馬關

磴道迴岡麓烟村擁野城逢碑欲弔古別辭始知名關隘三
秦轍江山萬里情孤燈愁絕處風雨送秋聲

汪佃一首

佃字友之弋陽人正德丁丑進士改庶吉士授編修
遷侍讀以講書不稱旨謫甯國通判起禮部郎中遷
太常少卿有東麓稿十卷

李默羣玉樓稿大江以南兄弟並居詞苑著聲聞者
有汪氏長曰石潭次曰間齋其季東麓文章師承得
之先輩不以時好輒廢繩墨
田按史稱張璠初拜學士諸翰林恥之不與並列璠

深恨及侍讀汪佃講供範不稱旨帝令補外聰乃請
自講讀以下量才外補改官及罷黜者二十二諸
庶吉士皆除部屬及知縣由是翰苑爲空余檢嘉靖
實錄與史合實錄云帝以侍讀汪佃講書遲鈍外調
改帝國通判查夏重西江志曾賓谷江西詩徵云佃
以編修議禮不合出爲松江同知非其實也詩綜亦
不詳佃仕履因特著之

水陽舟中

一簇炊烟暝色昏短籬疏竹數家村逢年田舍渾無事風雨

蕭蕭對掩門

林希元一首

希元字思獻晉江人正德丁丑進士除南大理評事
謫泗州州判歷大理寺丞謫欽州知州累遷雲南僉
事有次崖集十八卷

四庫

庫總目希元之學宗其鄉人蔡清故於明代諸儒惟
推薛瑄胡居仁季本同年相善而與本之書亦不少
雖與守仁門人季本同年相善而與本之書亦不少
假借其師其祭守仁文但推其功業而已無一字及
其學問也至其氣質剛急銳於用事則類其鄉人陳
真晟故其為南京大理評事則忤江彬忤御史譚會
忤大理等卿陳琳坐謫泗州州判及為大理寺丞又
請勦遼東叛兵坐謫欽州知州官廣東時值安南莫
登庸篡國力請討之疏凡六上竟坐是中計典歸歸
後又以爭郡邑利病幾中危法其負氣喜任事蓋可
想見其由泗州再入大理也蓋方獻夫霍韜薦之故
與二人頗相契集中與周石厓書亦自稱氣味與兀
厓相似又自稱大禮安南之議所見與兀厓同兀厓
者韜號也然在泗州時張璵桂萼欲引之同議大禮
終謝不行則諸人固不足為希元累矣集中有與汪
可亭書曰今悔內推大家者二人曰李空同何大復
二子雕詞鑄意刮陳去新力挽頽風以攬之古似為
一時文人也然考其所得典謨已乎盤詰已乎余皆
未能知也云云則非惟學問闕姚江即文章亦闕北
地信陽故其詩文皆惟意所如務盡所欲言乃止往
不往俚語與雅詞相參儷句與散體間用蓋其素志原
不欲以是見長云

雨中懷林汝桓同年

春園花已落，況復雨淋漓。寒到惟慙酒，愁來或點棋。故人千里外，強頂一官卑。欲寄相思信，何緣到海涯。

李士允

一首

士允字子中，祥符人。正德丁丑進士，歷官陝西參政。

兼苑馬寺卿，有《山藏集》。

藝苑卮言：李子中詩如「家奴燂赫車馬施散金帛，原非已物」。

舟次吉水

沙迴蓮雲氣，江清蕩水文。鷗行一鏡轉，猿嘯四山聞。閩楚風煙接，秋冬氣候分。愁心與秋葉，天外共紛紛。

李鶴鳴

三首

鶴鳴字九皋義烏人正德丁丑進士歷官大理寺丞
田按九皋詩頗綺麗亦能作清俊語

閨情

柳條垂綠東風柔斜日杏花紅欲流
畫樓簾捲珊瑚鉤美人翠斂纖蛾愁
山長路杳音信遲空憐紫燕雙銜泥
辛苦營巢傍綺閣墮淚不必爲夜呢

山居

石壁日初上春山風乍晴偶隨黃犢出
閒傍綠溪行幽鳥語無語落花如有聲
迴看飛瀑下樹杪白雲生

雜興

朱陽媚初夏庭宇生閒情餘寒戀春服
浮陰妨蠶晴雲頽山

翠重雨過林香清興至發高詠澹然心自平

柯維熊 一首

維熊字奇徵莆田人正德丁丑進士除行人遷工部
郎中有石莊集

撫松亭

自與世相違甯論生計微沙田秋後熟漁艇夜深歸種樹曾
鈔譜灌園甘息機本無食肉相非戀故山薇

王漸達 一首

漸達字用儀番禺人正德丁丑進士授刑部主事家
居十年以薦起官言事不報復乞歸隆慶初追贈光
祿少卿有青蘿集二十卷

梅花寺

梅花舊名刹此日又相過地僻翠蘿合山深寒雨多古碑還
半蝕丹竈已傳訛惟有菖蒲草春來綠滿阿

曹嘉一首

嘉字仲禮扶溝人正德丁丑進士選庶吉士改御史
以言事謫大名推官尋復故官再以言事下獄謫禹
城知縣降茂州判官尋復職出爲山西提學副使終
江西布政使有漫山集

藝苑卮言曹仲禮詩如公孫大娘弟子舞劍頗見淋漓見其師者不覺愴然

聞雁

連翩升紫塞嘹唳過秋城此夜高樓笛懷人幾度橫

江暉一首

暉字景孚仁和人正德丁丑進士改庶吉士諫南巡
杖闕下出爲廣德知州召授編修進修撰遷河南按
察僉事有賣爰子集

明詩選陳卧子曰景孚好怪合者亦六朝之遺
列朝詩集景孚爲文鉤立獵祕雜以古文奇字聲牙
詰曲令讀者謬根眩覓至莫能句隱口汗顏而罷徐
而釋之卑之無高論也與汴人曹嘉東楚王廷陳秦
馬汝驥齊名一時有曹王廷馬之稱集名賣爰子取
山海經賣爰山有鳥食者不妬之義以自寓也王稚
欽有詩嘲之云江生突兀揚文鋒千奇萬怪誰與同
博物豈惟精爾雅識字何止過楊雄求深索隱苦不
置一言忌使流俗同令弟大篆通鐘鼎絕響恥作斯
邕等生也爲文遺弟書一出皆稱二難並縱有楚史
不可讀滿堂觀者徒張目少年往往致譏評生也不
言但捫腹好醜從來安可期豪傑有時翻白疑請君
寶此無易轍聖人復起當相知

謝政志喜

雲戶焚魚珮煙汀放鶴舟寂寥歌白石浩蕩想丹邱挂席牽
風穩垂竿颺月流故園松菊在聊得慰窮愁

葉桂章一首

桂章字名山人正德丁丑進士改庶吉士授編
修遷侍講

宿勝上人禪堂

開土禪堂寂重來卧白雲地偏花竹淨身與鹿麋羣峯影窗
前暗鐘聲定後聞十年南劍路長愧北山文

彭簪一首

簪字世望安福人正德己卯舉人除衡山知縣遷知

靖州

懷念菴太史

每爲思君坐晚霞
那知人境卽天涯
可堪山閣連旬雨
又是春風一晌花
何處清江橫浦樹
誰家明月映溪沙
竹巖花谷無窮意
長望公來點物華

徐哲一首

哲字成夫南海人
正德己卯舉人
除新城知縣有半
城集

清明

驛路春將暮
江流夜不停
孤舟隨去住
一雨過清明
野墓芊芊草
荒園樹樹鶯
臨風聞縱目
鄉國倍關情

方邦望

二首

邦望字表民閩人正德己卯舉人官惠州推官有平

洲稿

送戴廣文

聞鶯懷故林騎馬出江潯共惜先生去誰知隱者心春風吹
祖席山月照離襟他日思安道悠悠剡水深

送何刺史之南中

揮袂別親知王程宿有期幾年遊嶺海萬里向滇池樹擁彤
檐轉花明墨綬垂遙思政成暇爲訪碧雞祠

張鎡

一首

鎡字叔治鄞人正德己卯舉人有鳳山稿

七夕詞

憶昔明皇清夜遊曾誇比翼笑牽牛
長生殿上金蓮燭不照
驪山草樹秋